

على سلامة

يا بختك يا عم
على يا سلامة
حتى ف حزنك
فادر تضحك
عارف تكتب
شعر جميل
قالوا الضاحك
حزنه كثير
قلبه عليل
طب فهمني كتبت ازاي
ايوووة خلاص
قالها الخال
شعبنا نساي
انسى ازاي
إن الفرح ميعاده اتأخر
و إن الحلم
ف نومي اتبخر
و ان العمر ده مش
بالسن
بس السن كمان
بيزيد
و إن القلب خلاص بيأن
عايز إيد

تمسك إيداه
و يمشوا بعيد
خايف ينسى
إنه صغير
فجاة يشيخ
خايف يغلط زي
زمان
اصل خلاص مابقاش
للحزن ف قلبي مكان
طب هو سؤال
قولى بتضحك برده
ازاي
طب بتبيعوا الضحك
ده فين؟!
اوعى تكون زينا
كداب
تعرف تضحك ع الاصحاب
لما يقولك ايه الاخبار؟؟
كله تمام
خايف مرة اقول
مش مبسوط
فاطلع صادق
كله تمام
كلمة جميلة
توفر وقت

مناقشة طويلة
مالك طيب؟!
ايه مش عجبك
نفسى عليا
و حيلتى قليلة
و الدنيا كيببييرة
و أنا جواها
مش راح ابان
فكله تمام

أميرة يحيي